


Museo Numismatico Aruba ta bai cumpli 30 aña di existencia

ORANJESTAD - Trinta (30) aña pasa e prome museo di Aruba a ser inaugura, na Macuarima 52, pa Gilberto F. (Betico) Croes. Juan Mario Odor a cuminsa colecciona placa den añanan '40 y el a wak e prome fruta mas o menos 30 aña despues ora cu Betico Croes a sostene su idea pa inicia un museo di placa aki na Aruba. E dos personanan aki a traha cu vision sano pasobra awe Aruba ta orguyoso di tin un Museo Numismatico. E calidad di pensamiento di e dos personanan aki a pone cu awe Aruba tin un atraccion historico / numismatico di caliber haltopafrece turismo, estudiante- y localnan.

Awendia ora bo drenta museo numismatico bo ta encontra un 'liña di tempo' practicamente completo ariba historia monetario / economico di Aruba y Antiyas. Cu hopi asombro bishitantenan ta comenta cu nunca nan por a pensa cu e tour den e liña di tempo ta asina claro y visual. E liña di tempo ta consisti di dos camber y 16 vitrina total cu ta contabo nos historia, prome y despues di Status Aparte. E muraya di e dos cambernan aki ta dorna cu potretnan di Aruba y di su hendenan cu ta data entre 1925 y 1935, saca pa Nancho Luidens †. Esaki ta duna tur bishitante e extra dimencion di wak Aruba y scucha relato di un otro periodo, ya distante di nos pero cu no mester lubida hamas pasobra e esfuerso y sudo di Arubianonan di antes a forma e Aruba di awe. Admirando e museo aki lo bo ripara cu tur cos ta relaciona cu otro den un of otro forma pa motibo di e liña di tempo, algo hopi unico y special pa experiencia.

Colecciona placa ta e especialidad di Museo Numismatico Aruba y nan personal ta coleccionistanan y conocedo (numismatico) di placa cu hopi experiencia. Nan por gradua y duna



E potret di archivo aki ta data for di 24 di November 1975, Betico Croes † y Juan Mario Odor † a proost cu champaña.

balor na placa cu por wordo cumpra of bendi nacional- y internacionalmente.

IDEALISMO

Interesante ta cu e idealismo di e museo aki ta cuadra cu e ideologia ariba nivel internacional di museonan tambe (museologia moderno): Un museo mester ta centro di informacion pa su comunidad y hunga un rol central. Esaki ta motibo pakico museo a cuminsa cu e proyecto:

“Cultura atrabes di Arte” / Culture in Art. Museo a sinti falta di sosten fuerte pa cu Tradicion, Cultura y Papiamento y ta di opinion cu esaki tambe ta tarea di tur museo. E proyecto aki ta re-enfora tur aspecto di nos cultura pero atrabes di arte. E idea ta pa cuadra projectonan di museo cu acitividadnan cultural di Gobierno / Insituto di Cultura of cualkier otro instancia cu ta organisa actividad cultural. Falta di hopi netwerk ariba e tereno aki y ta necesario pa diferente instancianan hala e garoshi aki y no depende ariba gobierno so. Naturalmente gobierno lo mester sostene e actividadnan aki cu man y pia ya cu nan no ta cai foi cielo tur dia.

Nos cultura y nos historia ta nos mes mester cuide y protehe. Falta hopi iniciativa ariba tereno cultural y museo a keda hopi satisfecho cu Ministerio di Cultura a cuminsa cu plan integral pa Cultura, cual ta den man di e museologa Ruby Eckmeyer. E promer evento di museo pa e proyecto ‘Cultura atrabes di

Arte’ tabata e exposicion di arte ‘Dera Gai’. E proyecto aki a bira famoso y a ser adopta pa nada menos cu Aruba Marriott Resort.

E hotel di renombre internacional ta sostene e idea di directora Desiree Croes pa traha un brug entre nos Cultura y Turismo y a bai di acuerdo pa pone exposicion cultural den nan residencia. Dia 14 di December proximo lo inaugura exposicion di arte: ‘DANDE’ den lobby di Aruba Marriott Resort tambe. Esakinan ta djis pa menciona cu Museo Numismatico Aruba ta trahando den forma di netwerk cu diferente instancia y ta logrando varios meta lentamente pero cu paso firme. Paralelo cu tur e actividadnan aki museo tin varios proyecto educativo manera poster cu a bai pa tur scol secundario: ‘YOTIN, dushi Papiamento I’. Pronto museo lo lanza su poster grandi 60x 90cm cu lo muestra e liña di tempo di Aruba completo cu potret y historia textual di placa. Un buki pa vierde klas basisschool pa siña muchanan conta placa na edad relativamente hoben tambe ta na caminda.

Personal di Museo Numismatico Aruba lo celebra 30 aña cu un anochi di cena hunto cu hopi exito pa celebra, tur sigur lo ta na memoria felis di nan fundador Juan Mario Odor. Pabien Museo Numismatico Aruba, na famia Odor y su directora cu ta fuerte para tras di trabou di su abuelo.